

दिनांक 11.01.2025

समय: 18.50 बजे

नमस्कार

आकाशवाणी जयपुर-अजमेर ऊं पेश है

प्रादेशिक समाचार

खास समाचार

- महिलावां अर बच्चां रा विकास ऊं जुड़्या मुद्दां माथे उदयपुर मांय चाल रह्या चिंतन शिविर मांय विचार जारी।
- गृहमंत्री अमित शाह कह्यो-लारला साल 16 हजार 900 करोड़ रुपया ऊं बत्ता मोल री नशीली चीजां जब्त करीजी।
- प्रदेश मांय आज न्यारी-न्यारी ठोड़ां बरसात अर कोहरा ऊं जिन्दगी माथे असर पड़्यो- केई ठोड़ां छांटा-छिड़का रो दौर जारी।
- युवा दिवस रे मौके काल जयपुर मांय व्हेवण वाळा रोजगार उत्सव मांय साढे तेरह हजार ऊं बत्ता नौजवानां ने नियुक्ति पत्र दिया जावेला।

समाचार विगतवार

केन्द्रीय महिला अर बाल विकास मंत्री अन्नपूर्णा देवी कह्यो है के सरकार महिलावां अर बच्चां रा पूरा विकास माथे खास ध्यान दे रही है। वे आज उदयपुर मांय महिलावां अर बच्चां रा भला रा बारा मांय राष्ट्रीय चिंतन शिविर रा औपचारिक उद्घाटन जळसा मांय बोल रही ही। वे महिला अर बाल विकास मंत्रालय री न्यारी-न्यारी पहलां री जाणकारी दीनी। केन्द्रीय मंत्री कह्यो के आंगनबाडियां रा नेटवर्क ने मजबूत कर्यो जा रह्यो है। वे कह्यो के बाल संरक्षण योजनावां रो बजट करीब डोढ़ हजार करोड़ रुपया व्हे ग्यो है, जो साल 2009 मांय 60 करोड़ रुपया हो।

एस.बी. अन्नपूर्णा देवी

कार्यक्रम मांय मुख्यमंत्री भजनलाल शर्मा प्रदेश मांय महिलावां अर बच्चां रा विकास सारू चलाई जा रही योजनावां सागे ई नीतिगत फैसलां अर आगली कार्ययोजनावां रा बारा मांय जाणकारी दीनी। वे कह्यो के राज्य सरकार ई महिलावां अर बच्चां री बेहतरी सारू भांत-भांत रा जतन कर रही है।

एस.बी. भजनलाल शर्मा

प्रदेश री उपमुख्यमंत्री अर महिला अर बाल विकास मंत्री दिया कुमारी कार्यक्रम मांय कह्यो के आं सत्रां रे मार्फत महिलावां अर बच्चां ने मजबूत बणावण ऊं जुड़ी न्यारी-न्यारी योजनावां रो मजमून तैयार कर्यो जावेला।

एस.बी. दिया कुमारी

चिंतन शिविर मांय मिशन वात्सल्य, मिशन शक्ति अर मिशन सक्षम आंगनबाड़ी सागे ही पोषण 2.0 रा बारा मांय चर्चा करी जा रही है। चिंतन शिविर काल पूरो व्हेला।

देश मांय लारला साल 16 हजार नौ सौ करोड़ रुपया ऊं बत्ता मोल री नशीली चीजां जब्त करीजी। केन्द्रीय गृहमंत्री अमित शाह आज नई दिल्ली मांय मादक पदार्थ तस्करी अर राष्ट्रीय सुरक्षा रा मुद्दा माथे राखी ज्या क्षेत्रीय सम्मेलन मांय आ जाणकारी दीनी। वे कह्यो के करीब 24 लाख किलोग्राम नशीली चीजां जब्त करीजी, जदके लारला दस साल मांय 56 हजार आठ सौ करोड़ रुपया ऊं बत्ता मोल री नशीली चीजां नष्ट करीजी।

एसबी अमित शाह

गृहमंत्री **ड्रग डिस्पोजल पखवाड़ा** अर सगळा राज्यां अर केन्द्र रा राज वाळा प्रदेशां सारु मानस-2 हेल्पलाइन रा विस्तार रो उद्घाटन ई कीनो। ड्रग डिस्पोजल पखवाड़ो 25 जनवरी ताई चालेला।

भारतीय हज समिति ई साल री हज रा मुकद्दस सफर सारु जावण वाळां री दूजी वेटिंग लिस्ट जारी कर दीनी है। इण मांय 3 हजार 676 जणां ने अस्थाई सीटां दीरीजी है। अल्पसंख्यक मामलात् मंत्रालय रे मुजब आं लोगां ने 23 जनवरी ऊं पैली जरूरी कागजात समेत हज रा खर्च ऊं जुड़्या दो लाख बहत्तर हजार तीन सौ रुपया जमा करावणा व्हेला। ई साल भारत ऊं एक लाख बाईस हजार जणा ने हज सारु भेज्या जावेला।

भारत, आधिकारिक सांख्यिकी रा हलका मांय बिग डेटा अर डेटा साइंस रा बारा मांय जाणकार देशां री संयुक्त राष्ट्र समिति मांय भेळो व्हे गयो है। सांख्यिकी मंत्रालय रे मुजब जाणकारां री ई समिति मांय भारत रो शामिल व्हेवणो देश रा सांख्यिकीय पारिस्थितिकी तंत्र सारु खास कदम है।

प्रदेश मांय आज श्रीगंगानगर, पाली, हनुमानगढ अर राजधानी जयपुर समेत केई ठोड़ां मेह बरस्यो। श्रीगंगानगर मांय आज दूजा दिन ई दोपहर ऊं सरु व्ह्यो हल्की बिरखा रो दौर रुक-रुक र चालतो रह्यो। म्हाणा खबरनवीस बतायो के मौसम मांय आया बदलाव अर घणा कोहरा ऊं जिन्दगी माथे असर पड़्यो है।

वीसी पीटीसी श्रीगंगानगर

नीम का थाना रा उदयपुरवाटी, श्रीमाधोपुर अर पाटन हलकां मांय छांटो छिड़को व्हे रह्यो है। करौली मांय ई कठे-कठे छांटा पड़्या। बारां अर सवाईमाधोपुर मांय आखा दिन बादळां मंड्या रह्या अर सीळो बायरो बाज्यो। डीग मांय कोहरो रह्यो। लारला चौबीस घंटा मांय चूरु, फलौदी, जोधपुर, ओसियां, बीकानेर, डेगाना, जैसलमेर, अलवर अर अजमेर मांय हल्की बरसात व्ही। ई बीचे माउंट आबू मांय न्यूनतम तापमान 3 दशमलव 4 डिग्री सेल्सियस दर्ज करी ज्यो। मौसम केन्द्र जयपुर रा निदेशक राधेश्याम शर्मा बतायो के प्रदेश मांय पश्चिमी विक्षोभ रो असर आवता कुछ घंटा और रेहवेला।

एसबी राधेश्याम शर्मा

जोधपुर मांय चाल रह्या पश्चिमी राजस्थान हस्तशिल्प मेळा मांय सात सौ ऊं बत्ता हाथ रा कारीगरां कानी ऊं बणायी ज्या सामान रो दरसाव कर्ग्यो जा रह्यो है। मेळा मांय केन्द्रीय शुष्क क्षेत्र अनुसंधान संस्थान—काजरी री ओर ऊं लगायी ज्यी स्टॉल माथे खेती—बाड़ी री नुवी तकनीकां अर कम पाणी मांय बत्ती उपज लेवण रा बारा मांय जाणकारी दी जा रही है। वठे नुवी भांत रा चैरी, टमाटर, बाजरा रा कुरकुरा अर मोटा अनाज ऊं बणी दूजी चीजां मिल रही है।

सियाळा री रूत मांय खानपान मांय ई बदलाव आवे है। प्रदेश मांय सर्दियां मांय बणबा वाळा पारम्परिक व्यंजन हैं अर आजकाल मोकळा पारम्परिक व्यंजन बणाया जा रह्या है।

वीसी सालेहा गाजी

नामचीन समाज सुधारक स्वामी विवेकानन्द री जयंती काल राष्ट्रीय युवा दिवस रा तौर ऊं मनाई जावेला। ई सिलसिला मांय नई दिल्ली रा भारत मंडपम मांय राष्ट्रीय युवा महोत्सव मणायो जा रह्यो है। प्रधानमंत्री नरेन्द्र मोदी कह्यो है के **विकसित भारत युवा नेता संवाद** देश रा नौजवानां ने भारत री विकास यात्रा मांय शामिल करण री अनूठी पहल है। श्री मोदी आज युवा अर खेल मामलात् राज्य मंत्री रक्षा खडसे रो राष्ट्रीय युवा उत्सव 2025 अर विकसित भारत युवा नेता संवाद रा बारा मांय लिख्योडो लेख साझा कीनो।

वे कह्यो के ई कार्यक्रम रो मकसद विकसित भारत रो सपनो सांचो करण सारू नौजवानां री ऊर्जा, रचनात्मकता अर नेतृत्व ने दिशा देवणो है। राज्यपाल हरिभाऊ बागडे ई युवा दिवस रा सिलसिला मांय जनता ने बधाई देता थकां विकसित भारत 2047 रो सपनो सांचो करण सारू स्वामी विवेकानन्द रा आदर्श अपणावण री अपील कीनी। ई बीच **पाली** जिला रा बाली मांय राष्ट्रीय युवा दिवस ऊं पैली आज नशा मुक्ति, टाबरियां री आला दर्जा री भणार्ई—लिखाई अर आध्यात्मिक स्वास्थ्य रा बारा मांय संगोष्ठी राख्यी ज्यी। जयपुर रा सवाईमानसिंह स्टेडियम मांय चाल रह्यो राज्य स्तर रो युवा महोत्सव काल पूरो व्हेला। जयपुर मांय राख्या जा रह्या रोजगार उत्सव मांय युवा दिवस रे मौके मुख्यमंत्री भजनलाल शर्मा साढे 13 हजार ऊं बत्ता नौजवानां ने नियुक्ति पत्र सूपेला। आं मांय चिकित्सा, वित्त, गृह, राजस्व अर शिक्षा विभाग मांय नियुक्तियां शामिल है। **सवाई माधोपुर** अर **झालावाड़** समेत न्यारा—न्यारा जिलां मांय ई काल जिला स्तर रो मुख्यमंत्री रोजगार उत्सव राख्यो जावेला।

साइबर अपराधां रा बधता मामलां ने ध्यान राखता थकां आज पाली मांय जनता अर स्कूली बच्चां ने साइबर धोखाधड़ी रा बारा मांय जाणकारी दीरीजी। ई मौके पुलिस रा अहलकार डिजिटल अरेस्ट अर ऑनलाइन गेमिंग रे जरिए व्हेवण वाळी ठगी ऊं सावचेत रेहवण बाबत् कह्यो। जिला रा सिनेमाघरां मांय अब फिल्म सरू व्हेवण ऊं पैली साइबर हिफाजत ऊं जुडी क्लिप बतावणो जरूरी कर दियो ज्यो है।

पर्यटन विभाग री ओर ऊं जयपुर मांय कल्चरल डायरीज कार्यक्रम रा तैत आज अल्बर्ट हॉल सामी डिवाइन रिदम संध्या राख्यी जा रही है। इण मांय महेशाराम अर साथी कलाकार भक्ति गीत पेश कर रह्या है।

शहर रा जवाहर कला केन्द्र मांय ई आज ध्रुपद गायन समारोह राख्यो जा रह्यो है। उत्तर क्षेत्र सांस्कृतिक केन्द्र पटियाला री मदद ऊं राख्या जा रह्या ई आयोजन मांय पद्मश्री ऊं नवाजी ज्या वासिफुद्दीन डागर अर सुनीता अमीन ध्रुपद गायन पेश कर रह्या है। **राजसमंद** मांय ई आज मेवाड़ टॉक फेस्ट सरू व्ह्यो। दो दिन रा ई कार्यक्रम मांय साहित्य, कला, संगीत अर संवाद ऊं जुडी प्रस्तुतियां दी जा रही है।

प्रधानमंत्री नरेन्द्र मोदी आकाशवाणी ऊं प्रसारित कर्या जावण वाळा खास कार्यक्रम **मन की बात** मांय ई दफ़ा 19 जनवरी दीतवार ने विचार बतावेला। आकाशवाणी ऊं ओ कार्यक्रम दस साल ऊं बत्ता बगत ऊं प्रसारित कर्यो जा रह्यो है। ई महीना मन की बात कार्यक्रम री 118वीं कड़ी प्रसारित करी जावेला। ई सारू आप ई 17 जनवरी तांई मुफ्त नम्बर 1 8 0 0 – 1 1 – 7 8 0 0 माथे राय अर विचार भेज सको हो। ई रे अलावा 1922 नम्बर माथे घंटी दे र एस एम एस ऊं मिल्या लिंक रे जरिए ई सुझाव भेज्या जा सके है। नरेंद्र मोदी एप या माई जीओवी ओपन फोरम रे मार्फत ई ऑनलाइन तरीका ऊं सुझाव दिया जा सके है।

खास समाचार एकर फेर ऊं सुण लिराओ—

- महिलावां अर बच्चां रा विकास ऊं जुड़्या मुद्दां माथे उदयपुर मांय चाल रह्या चिंतन शिविर मांय विचार जारी।
- गृहमंत्री अमित शाह कह्यो—लारला साल 16 हजार 900 करोड़ रुपया ऊं बत्ता मोल री नशीली चीजां जब्त करीजी।
- प्रदेश मांय आज न्यारी—न्यारी ठोड़ां बरसात अर कोहरा ऊं जिन्दगी माथे असर पड़्यो—केई ठोड़ां छांटा—छिड़का रो दौर जारी।
- युवा दिवस रे मौके काल जयपुर मांय व्हेवण वाळा रोजगार उत्सव मांय साढे तेरह हजार ऊं बत्ता नौजवानां ने नियुक्ति पत्र दिया जावेला।